

Ta cuminsa cu renobacion y modernisacion Pastoor Hendrikstraat




ORANJESTAD (AAN): Prome Minister Eman dialuna atardi tabata masha satisfecho cu e desaroyonan na San Nicolas y banda di a firma pa ehecucion di e proyecto renobacion di di Pastoor Hendrikstraat, tabatin e ceremonia di cendemento di luz riba Village Plasa cu a wordo construi net banda di Oficina Auxiliar di Gobierno na San Nicolas.

E mandatario a splica cu San Nicolas ta hayando su debido atencion bou di e Gobierno cu e ta lidera, mirando e diferente proyectonan cu a wordo realisa caba den e area aki. “Pa nos e ta un momento importante atrobe pa yega na otro cumplimiento di un programa y vision cu nos a pone for di momento cu nos a asumi responsabilidad di gobernacion.”

E mandatario a duna un breve relato di e situacion cu su Gobierno a haya e pais aden, completamente deteriora cu un falta di vision pa hiba e desaroyo di Aruba na un nivel di calidad cu por garantisar un miho calidad di bida pa nos ciudadanonan.”

El a ilustra Aruba su situacion den e tempo ey: un pais den crisis pa ciere di e refin-
eria y efectonan di e colapso



economico mundial. Esaki a bin na momento cu pa hopi aña e Gobierno cu tabata na mando no a inverti den infraestructura ni tampoco den edificacionan di Gobierno, monumento of scolnan. “E estado di nos pais tabata den pleno deterioro.”

Ta basa riba e situacion aki, Gabinete Mike Eman a aserca Hulanda cu e peticion pa duna otro prioridad na e fondonan disponibel den FDA (Fondo di Desaroyo Aruba). Principalmente pasobra e meta pa cual nan tabata destina, no lo a crea empleo p.e. den construccion. Asina Gobierno a logra haya 200 miyon florin pa renoba pais Aruba.

“Na momento cu nos a haya e fondonan aki basa riba e relacion nobo di amistad y confiansa den Reino, nos a sinta hunto den Consejo di Minister pa dicidi con ta bay reparti e suma aki pa renobacion di bario, scol, centronan di ciudad y infraestructura. Un bon parti di esaki a wordo aloca pa San Nicolas cu pa hopi aña no a haya e atencion mereci y asina a haya e inversionnan cu awendia ta wordo haci den San Nicolas.”

Algun proyecto di San Nicolas cu a keda finalisa caba ta renobacion di Juwana Morto, De Vuyst, Village Plasa, prome fase di e bario di Village, centro di gobernacion (ex Ambulance bieu). Den caso di Pastoor Hendrikstraat, Prome Minister Eman a indica cu e caya ta un ader importante cu ta distribui e trafico pa e otro cayanan di San Nicolas y tabata mester di atencion cu un infraestructura moderno. “Nos ta felicita e Minister di San Nicolas Mike de Meza, kende semper ta pusha pa proyectonan di e area aki,” Premier Eman a bisa y a agrega cu e proyecto di Pastoor Hendrikstraat ta otro inversion importante pa creacion di empleo y infraestructura.

Tur e proyectonan aki ta cuadra tambe cu e reforma fiscal cu a drenta na vigor recientemente, unda cu comerciantenan cu kier establece nan negoshi den San Nicolas, lo haya beneficcionan fiscal si nan cumpli cu cierto rekisitonan. Gabinete Mike Eman a haya e reforma fiscal hopi importante pa atrae negoshinan nobo pa e districto aki.